

Na osnovu člana 37. stav 3. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09 i 44/10) i Pravilnika o pratećoj dokumentaciji za davanje prethodne saglasnosti za zaduženje kantona, općine, grada ili javnog preduzeća po osnovu vanjskog duga ("Službene novine Federacije BiH", broj: 14/08), Parlament Federacije Bosne i Hercegovine na sjednici Predstavničkog doma, održanoj _____ 2013. godine, i na sjednici Doma naroda, održanoj _____ 2013. godine, donio je

ODLUKU

O DAVANJU PRETHODNE SAGLASNOSTI ZA KREDITNO ZADUŽENJE JP ELEKTROPRIVREDA BIH D.D. SARAJEVO KOD EVROPSKE BANKE ZA OBNOVU I RAZVOJ (EBRD) ZA REALIZACIJU PROJEKTA IZGRADNJE HE VRANDUK I PROJEKTA REHABILITACIJE I PROŠIRENJA KAPACITETA HE UNA KOSTELA

I.

Ovom Odlukom daje se prethodna saglasnost za kreditno zaduženje Javnog preduzeća Elektroprivreda Bosne i Hercegovine d.d.- Sarajevo (u daljem tekstu: JP EP BiH) kod Evropske banke za obnovu i razvoj (u daljem tekstu: EBRD) za realizaciju Projekta izgradnje HE Vranduk i Projekta rehabilitacije i proširenja kapaciteta HE Una Kostela u iznosu od 35.000.000,00 EUR-a, pod slijedećim uslovima:

- rok otplate.....12 godina,
- grace period.....2 godine (uključen u rok otplate),
- kamatna stopa.....šestomjesečni EURIBOR + 3% marža na godišnjem nivou,
- dospijeće.....polugodišnje u jednakim otplatama glavnice,
- datum plaćanja glavnice i kamata.....7. maj i 7. novembar svake godine,
- troškovi korištenja kredita:0,5% na nepovučeni iznos kredita,
- jednokratna provizija.....1% na iznos kredita, jednokratno,
- naknada za administriranje kredita.....EUR 10.000,00 godišnje, do otplate kredita.

II.

Sredstva kredita iz tačke I. ove Odluke koristit će se za finansiranje :

- Projekat izgradnje HE Vranduk u iznosu od 26.000.000,00 EUR i
- Projekat rehabilitacije i proširenja kapaciteta HE Una Kostela u iznosu od 9.000.000,00 EUR.

III.

Potvrđuje se da je razmatrana dokumentacija prihvatljiva i to:

- Zapisnik sa pregovora,
- Nacrt Ugovora o kreditu između EBRD i JP EP BiH.

IV.

Za realizaciju ove Odluke zadužuje se Federalno ministarstvo energije, rudarstva i industrije i JP EP BiH, svako u okviru svoje nadležnosti.

V.

Implementacija Ugovora iz tačke I. ove Odluke ne zahtijeva donošenje novih ili izmjenu postojećih zakona.

VI.

Ova Odluka stupa na snagu narednog dana od dana objavljivanja u "Službenim novinama Federacije BiH".

PFBiH broj: _____/13
_____ 2013. godine
Sarajevo

Predsjedavajući
Doma naroda
Parlamenta Federacije BiH

Radoje Vidović, s. r.

Predsjedavajući
Predstavničkog doma
Parlamenta Federacije BiH

Fehim Škaljić, s. r.

O B R A Z L O Ž E N J E
ODLUKE O DAVANJU PRETHODNE SAGLASNOSTI ZA KREDITNO ZADUŽENJE JP
ELEKTROPRIVREDA BiH D.D.- SARAJEVO KOD EVROPSKE BANKE ZA OBNOVU I
RAZVOJ (EBRD) ZA REALIZACIJU PROJEKTA IZGRADNJE HE VRANDUK I
PROJEKTA REHABILITACIJE I PROŠIRENJA KAPACITETA HE UNA KOSTELA

PRAVNI OSNOV

Pravni osnov za donošenje ove Odluke sadržan je u članu 37. stav 3. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09 i 44/10) i odredbama Pravilnika o pratećoj dokumentaciji za davanje prethodne saglasnosti za zaduženje kantona, općine, grada ili javnog preduzeća po osnovu vanjskog duga ("Službene novine Federacije BiH", broj: 14/08), kojim je definisano da će zaduženje javnih preduzeća po osnovu vanjskog duga, zajedno sa pratećom dokumentacijom, biti predmet predhodne saglasnosti Parlamenta Federacije i Parlamentarne skupštine Bosne i Hercegovine.

Kako se donošenje odluka Parlamenta Federacije BiH, u skladu sa članom 165. i 206. Poslovnika Predstavničkog doma Parlamenta Federacije Bosne i Hercegovine ("Službene novine Federacije BiH", br. 69/07 i 2/08), te člana 157. i člana 203. Poslovnika Doma naroda Parlamenta Federacije Bosne i Hercegovine ("Službene novine Federacije BiH", br. 27/03 i 21/09), vrši po postupku za donošenje zakona, to je potrebno i mišljenje Vlade Federacije Bosne i Hercegovine.

Članom 37. stav 3. Zakona o dugu, zaduživanju i garancijama u Federaciji Bosne i Hercegovine izričito je utvrđeno da će, pored ostalog, zaduženje javnih preduzeća po osnovu vanjskog duga, zajedno sa pratećom dokumentacijom, biti predmet prethodne saglasnosti, kako Parlamenta Federacije Bosne i Hercegovine, tako i Parlamentarne skupštine Bosne i Hercegovine, budući da je stavom 4. pomenutog člana propisano da zaduženje koje nije odobreno u skladu sa stavom 3. tog člana neće biti važeća i provodiva obaveza kantona, općine, grada i javnog preduzeća koje se zadužilo.

Prije podnošenja prijedloga ove odluke, Federalno ministarstvo energije, rudarstva i industrije je, dopisom broj: 05-14-1540/13 od 13.06.2013.g., zatražilo mišljenje od Federalnog ministarstva finansija/finansija na zahtjev JP EP BiH d.d.- Sarajevo i preteću dokumentaciju, te dobilo mišljenje broj: 08-14-2570/13 V.N. od 10.06.2013.g., koje se dostavlja u prilogu.

RAZLOZI ZA DONOŠENJE

Odobrena sredstva kredita od strane EBRD u iznosu 35 mil. EUR namijenjena su za realizaciju Projekta izgradnje HE Vranduk i Projekta rehabilitacije i proširenja kapaciteta HE Una Kostela.

Odlukom Vlade Federacije BiH utvrđen je javni interes za izgradnju više elektroenergetskih objekata, uključujući gore navedene, u cilju obezbjeđenja kontinuiranog snabdijevanje kupaca električnom energijom.

Preporuke studija i strateških planova i programa razvoja elektroenergetskog sektora Federacije BiH i BiH prema kojima JP EPBiH, u cilju zadovoljavanja potreba za povećanom potrošnjom električne energije i zadržavanja izvoznog trenda, gradi nove kao i zamjenske proizvodne objekte.

Obrazloženje pojedinih tačaka

Tačka I. je nužna kako bi se moglo dalje procesuirati zaduženje JP EP BiH kod EBRD-a i precizirani su uslovi kredita.

Tačkom II. potvrđuje se namjena utroška sredstava po Ugovoru o kreditu.

Tačkom III. potvrđuje se da je prihvatljiva dokumentacija parafirana tokom pregovora sa EBRD.

Tačkom IV. se za realizaciju ove Odluke zadužuju Federalno ministarstvo energije, rudarstva i industrije i JP EP BiH, svako u okviru svoje nadležnosti.

Tačka V. potvrđuje da za implementaciju Ugovora o finansiranju nije potrebno donijeti nove ili izmijeniti postojeće zakone.

Tačka VI. propisuje stupanje na snagu ove Odluke.

FINANSIJSKA SREDSTVA

Za realizaciju ove odluke nije potrebno izdvojiti posebna finansijska sredstva u Budžetu Federacije BiH, budući da zaduženje kantona, općine, grada i javnog preduzeća, u skladu sa članom 37. stav 5. Zakona o dugu, zaduživanju i garancijama u Federaciji Bosne i Hercegovine, nije dug Federacije i Federacija neće imati nikakve obaveze u vezi sa tim dugom.